

NOEL

---BETO ZITISA NGULUSI YESU---



Merci beaucoup na www.freebibleimages.org/Lambsons sambu na foto yai.

**Baleso 3 ya ecodim sambu na bana
na fete ya Noel**

LONGI, TALA MBOTE:

KANA MWANA ZOLA YAMBA YESU, SADILA BACARTE YA KUTWADISA. PESA YANDI NTETE MALONGI YA BACARTE 1-4, ebuna TWADISA YANDI NA LOMBILU YA CARTE 5.
Na nima, meka kubenda yandi kukota malongi ya mbotika bonso mulandi. Kana yandi kele mambre ya dibundu ya nkaka ti bibuti zola ve yandi kuma mulandi, benda yandi kulanda malongi na ecodim, ti NGE sosa occasion kulonga bampangi ndambu-ndambu na nzo na bo mosi.
MCE ikele na bacarte ya nkaka, BACARTE YA KUYELA, ya nge lenda sadila sambu na malongi yai, na nima muntu me yamba Yesu na ntima na yandi.

KULONGA VERSE YA BIBLE: Bana ta bambuka verse mbote-mbote kana nge tula yo na nkunga. Nge mosi lenda yidika ton, to lomba lusadIsu ya muntu ya nkaka ke ngolo na musiki. Mbote ton vanda na ritime mingi ya pesa kiese. Bana lenda bula maboko, sala bageste, to kina ntangu bo ke yimba verse.

Leso 1 Maria butaka Yesu.....	3
Leso 2 Bantu ya Este kwisaka kusamba Yesu.....	8
Leso 3 Fami ya Yesu tinaka, na nima bo yutukaka diaka.....	12

Leso 1- MARIA BUTAKA YESU

BAVERSE YA LESO: *Luka 1:26-32, 2:1-7, Matayo 1:18-25*

KIKUMA YA LESO: Beto yamba Yesu na ntima na beto bonso Ngulusi ti Mfumu.
Beto bakristo yitisa yandi, na bisambu, na bankunga, ti na luzingu na beto.

VERSE YA KULONGUKA: *Matayo 1:21b*

(Wanzio ke tuba na Maria) Nge ta pesa yandi zina : Yesu, sambu yandi muntu ta katula bantú na masumu na bo.

Verse Sambu na Bana ya Fioti: Nge ta pesa yandi zina Yesu

BANKUNGA YA KWENDA NZILA MOSI TI LESO YAI:

Emanuele

Mwana Nzambi Mene Kuma Awa
Na Mbeto ya Nsukami
Yangalala, Bantu Yonso!

KUYIDIKA NA NTWALA YA LESO: Poupee ya Yesu sambu na baleso yai yonso tatu.

KUYANTIKA LESO: Keti nge me wa zina ya muntu ya ke zola tuba mambu ya mbote mingi (disongidila na yo kele mbote)? (Bana pesa mvutu.) Bubu beto ta mona zina mosi ya mbote mingi, ya kitoko mingi, zina ya ngolo ya Yesu Kristo. Beno kuwa mbote. Na nsuka mono ta yula beno inki kele disongidila ya zina na yandi.

MAMBU YA NENE YA LESO YAI:

1. Nzambi tubaka na Maria na munoko ya wanzio.

A. Tanga: *Luka 1:26-32*

26 Ntangu Elisabeti vandaka na divumu ya bangonda sambanu, Nzambi tindaka wanzio Gabriele na bwala mosi na ntoto ya Galilea, zina na yo Nazareti.

27 Nzambi tindaka wanzio yango na mwana-nkento mosi, zina na yandi Maria. Mwana-nkento yina vandaka na dilaka ya makwela na Yozefi, muntu ya dikanda ya Davidi.

28 Wanzio kwisaka kukuma na nzo ya Maria. Wanzio tubilaka yandi nde: “Mbote na nge ! Mfumu Nzambi ke tala nge na disu ya mbote; yandi kele ti nge.”

29 Maria bwaka kisakasaka sambu na mambu yina ya wanzio tubaka: yandi vandaka kudiyula : ‘Nki disongidila ya mbote yina ?’

30 Ebuna wanzio tubilaka yandi nd e: “Maria, kumona boma ve. Nzambi me tala nge na disu ya

*mbote. 31 Nge ta baka divumu; nge ta buta mwana ya bakala; nge ta pesa yandi zina : Yesu.
32 Yandi ta vanda muntu ya nene. Zina na yandi ta vanda Mwana ya Nzambi-Mpungu. Mfumu Nzambi ta tula yandi ntotila bonso vandaka ntotila na yandi Davidi.*

B. Yula bana:

- Nzambi tindaka inki wanzio?
- Nzambi salaka yo ntangu mpangi ya Maria, Elisabeti, vandaka na divumu ya bangonda ikwa?
- Wanzio kwendaka na inki bwala?
- Wanzio kwendaka na nkento ya vandaka na dilaka ya makwela na nani? (Dilaka ya makwela vandaka ndambu bonso engagement na beto. Mwana-nkento vandaka fiancé ya Yozefi.)
- Wanzio songaka Maria inki nsangu?
- Mwana yandi ta buta, yandi ta vanda mwana ya nani?
- Mwana yina mpi ta vanda inki?

C. Songa inki me salama na théâtre:

Bana zole sala bonso wanzio Gabriele ti Maria, kusonga inki me salama na kitini yai.

D. Yimba ti kina kusonga inki me salama:

Nzambi tindaka wanzio zina ya Gabriele
Na mwana-nkento ya mene kwela ntete ve
Na mwana-nkento zina ya Maria.

Wanzio songaka Maria nde
Nge ta buta mwana-bakala.
Nge ta buta Mwana ya Nzambi.

O yea! (repeter)

2. Nzambi tubaka na Yozefi na munoko ya wanzio.

Tanga: Matayo 1:18-25

*18 Yesu Kristo butukaka mpidiyai: mama na yandi Maria vandaka nkento ya Yozefi,
kansi ntangu bo vandaka me kwela ntete ve, Maria monaka nde yandi ke na divumu ya
Mpeve ya Nzambi.*

19 Bakala na yandi Yozefi vandaka muntu mosi ya mbote. Kansi yandi zolaka ve

*kumonisa Maria nsoni na meso ya bantú. Yo yina yandi tubaka na ntima na yandi nde:
“Mono fweti bikisa yandi na kinsweki.”*

*20 Ntangu Yozefi vandaka kuyindula mambu yina, wanzio mosi ya Mfumu Nzambi
kwisaka kumonika na yandi na ndosi. Wanzio tubilaka yandi nde : Yozefi, muntu ya
dikanda ya Davidi, kuwa boma ve na kukotisa Maria na nzo na nge. Sambu Mwana na
yandi me katuka na Mpeve ya Nzambi.*

*21 Yandi ta buta mwana-bakala. Nge ta pesa Yandi zina Yesu, sambu Yandi muntu ta
katula bantú na masumu na bo.*

*22 Mambu yina yonso kubwaka sambu na kulungisa mambu yina ya Mfumu Nzambi
songaka profete na kutuba nde :’*

*23 Mwana-nkento yina me zabaka ntete bakala ve ta baka divumu, yandi ta buta
Mwana-bakala. Bo ta pesa yandi zina “Emmanuele” (disongidila nde Nzambi kele na
beto).*

*24 Ntangu Yozefi telamaka na mpongi, yandi salaka mambu yina ya wanzio ya Mfumu
songaka yandi ya kusala, yandi kotisaka Maria na nzo na yandi na kuvanda nkento na
yandi.*

*25 Kansi Yozefi zabaka Maria ve tii kuna yandi butaka mwana ya bakala. Yozefi pesaka
yandi zina: Yesu.*

3. Yesu Kristo butukaka na mpila ya Nzambi silaka ntama.

A. Tanga: Luka 2:1-7

*1 Na ntangu yina Auguste, ntotila ya nene ya kimfumu ya Roma, songaka nde bantú yonso na
bansi yonso ya kimfumu na yandi, bo fweti sonikisa bazina na bo.*

*2 Yina vandaka mbala ya ntete bantú ya kusonikisa bazina na bo. Bo salaka yo ntangu
Kiriniusi vandaka guvernere ya province ya Siria.*

3 Bantu yonso vandaka kwenda kusonikisa bazina na bo, konso muntu na bwala na yandi.

*4 Yozefi mpi katukaka na bwala Nazareti na ntoto ya Galilea, yandi kwendaka na bwala ya
Mfumu Davidi, zina na yo Betelemi, na ntoto ya Yudea, sambu yandi vandaka muntu ya
dikanda ya Davidi.*

*5 Bo kwendaka kusonikisa bazina na bo ti fiancé na yandi Maria. Maria vandaka na
divumu,*

6 ebuna ntangu bo vandaka kuna, kilumbu na yandi ya kubuta kulungaka.

*7 Yandi butaka mwana ya bakala, mwana na yandi ya ntete. Yandi kangisaka mwana na
bilele. Yandi tulaka yandi na kima ya bambisi vandaka tudila madia na bo, sambu bo zwaka*

kisika ve na nzo ya banzenze.

B. Yula bana:

- Sambu na inki Yozefi ti Maria katukaka na Nazareti ti kwendaka na Betelemi?
- Inki mambu ya nene salamaka bu bo vandaka kuna?
- Nzambi silaka ntama nde Mesia fweti butuka na Betelemi (Mika 5:2). Maria butaka Yesu na nzo ya bambisi na inki bwala?
- Nzambi tubaka ntama nde Mesia ta butuka bonso nsukami (Zakaria 9:9). Inki ke songa nde Yesu butukaka mutindu yina?

C. Songa inki me salama na théâtre:

Bana sala bonso Ntotila Auguste ya Roma (ya songaka ordre nde bantu fweti sonika bazina na bo), Yozefi, ti Maria. Sadila poupee sambu na Yesu. Bana ya nkaka lenda sala bonso bantú ya nkaka ya vandaka kukwenda sambu na kusonika bazina na bo. Mwana ya nkaka vanda Profete Mika. Yandi telema, yandi tuba nde, bo kwendaka na Betelemi, sambu Nzambi me songa mono ntamaaaa nde Mesia ta butama na Betelemi. Mono sonikaka yo sambu Nzambi tubaka yo, ti yo salamaka sambu mono sonikaka yo na kati ya Bible.

D. Yimba ti kina sambu na kusonga inki me salama:

Mfumu ya Roma songaka nde bantu vutuka
Bo vutuka na bwala na bo
Ti bo sonika bazina.
Sambu na mpaku ya leta.

Yozefi ti Maria kwendaka
Vutuka na Betelemi.
Ntangu yina, ntangu lungaka
Ye Yesu butamaka.

KUMANISA LESO: Inki kele disongidila ya zina Yesu? (Ngulusi, sambu yandi muntu ta katula bantu na masumu na bo.)

KUBINGA NA YESU: Songa bana nde kana bo mona bonso bo me yamba Yesu ntete ve na ntima na bo bonso Ngulusi, bo lenda bikala na nima ya Ecodim, ebuna nge ta solula ti bo sambu na kutwadisa bo na Yesu.

MALONGI YA BAKRISTO: Bana yonso na kimvuka lenda kumisa Nzambi sambu Yandi tindilaka beto mwana na yandi sambu na kugulusa beto.

KUSALA KANA NTANGU TA LUNGA: Yula bana baquestio ti sala theatre. Tuba diaka verse (mbala zole), ebuna pesa ntangu sambu na bana 4 kutuba yo mosi-mosi. Tula yo na nkunga ti yimba yo ti bana.

Kabisa bana na bimvuka ya bana 5 ou 6. Konso kimvuka ta sala nkunga mosi ya bandinga ya bo mosi, ya ke pesa Yesu lukumu. Konso kimvuka lenda yimba nkunga na bo na ntwala ya bana yonso. Bana bambuka kumisa Yesu lumbu na lumbu.

Yo kele kaka bandinga mpamba ve ya pesa Yesu lukumu, kansi luzingu na beto ya mvimba, kana beto ke salaka mambu ya yandi ke zola. Solula inki beto lenda sala ya ke pesa Yesu kiese ti lukumu.

====

NSUKA YA LESO 1

====

Leso 2- BANTU YA ESTE KWISAKA KUSAMBA YESU

BAVERSE YA LESO: *Matayo 2:1-12*

KIKUMA YA LESO: Bantu ya mayele mingi kwisaka kusamba Yesu ti kupesa yandi makabu. Beto mpi ke na mfunu kuzitisa yandi na bisambu ti na makabu.

VERSE YA KULONGUKA: Matayo 2:11b

... bo fukama, bo samba yandi, bo kangula bamwa-sanduku na bo, yo pesa yandi makabu yai: wolo ti bima ya mananasi ti mire.

Verse Sambu na Bana ya Fioti: "Bo samba yandi...bo pesa yandi makabu"

KUYANTIKA LESO: Nani ke mona kiese na ntima kana bantu ke pesa yandi makabu? Inki makabu ke pesaka nge kiese? (Bana lenda pesa ndambu bamvutu.)

MAMBU YA NENE YA LESO YAI:

1. Bantu ya mayele kwisaka kutala Yesu.

A. Tanga: *Matayo 2:1-2*

1 Yesu butukaka na bwala Betelemi, na ntoto ya Yudea, ntangu Erode vandaka ntonila. Na nima, bantu ya nkaka yina vandaka na kisalu na kuyindula bambwetete bo katukaka na nsi mosi na ndambu ya Este, bo kwisa kuma na bwala Yerusalem.

2 Bo yulaka nde : "Wapi mwana yina me butuka sambu na kuvanda ntonila ya Bayuda ? Beto monaka mbwetete na yandi ntangu yo monikaka na ndambu ya Este, ebuna beto me kwisa sambu na kusamba yandi."

B. Yula bana:

- Bo katukaka wapi?
- Bo vandaka bantu ya inki mutindu?
- Bo vandaka kuyindula inki?
- Bo kwisaka wapi?
- Inki twadisaka bo?
- Sambu na inki bo kwisaka na Betelemi?

C. Songa inki me salama na théâtre :

Ndambu ya bana sala bonso bo kele bantu ya Este, ke landa mbwetete ya Yesu.

D. Yimba ti kina sambu na kusonga inki me salama :

Wapi mwana ya me butuka ?
Ntotila ya Israele?
Beto me mona mbwetete na Yandi
Ye beto me landa yo. Mmm. Mm.

2. Bo songaka Mfumu Erode, ti yandi bingaka baprofete kusonga Mesia ta butuka wapi.

A. Tanga: Matayo 2:3-8

3 *Ntangu ntotila Erode waka mambu yina, yandi ti bantu yonso na Yeruzalemi, bo vandaka ntima na zulu.*
4 *Erode bingaka bambuta yonso ya banganga-Nzambi ti balongi yonso ya Bansiku. Yandi yulaka bo : ‘Mesia fweti butuka wapi ?*
5 *Bo vutulaka nde : ‘Na Betelemi, na ntoto ya Yudea, sambu profete sonikaka mpidiyai nde :*
6 *Nge bwala Betelemi, na ntoto ya Yudea, Ya kieleka, nge kele bwala mosi ya mfunu na katì ya babwala ya Yudea, Sambu mfumu yina ta basika na nge, Yandi ta nataka bantu na mono Israele.’ ”*
7 *Ebuna na mayele yonso, Erode bingaka bantu yina katukaka na ndambu ya Este. Bo zabisaka yandi ntangu mpenza ya mbwetete yina monikaka.*
8 *Ntangu yai, yandi tindaka bo na Betelemi. Yandi tubaka nde : “Beno kwenda kusosa mwana yina mbote-imbote. Kana beno me mona yandi, beno kwisa zabisa mono. Mpidina mono mpi, mono ta zaba kwenda kusamba yandi.”*

B. Yula bana:

- Nzambi yandi mosi twadisaka bo na kulanda inki?
- Nani vandaka Mfumu ya ntoto Betelemi? (Erode. Yandi yalaka na Betelemi.)
- Keti yandi vandaka na kiese sambu na lubutuku ya Yesu?
- Inki mutindu Erode zabaka sika ya lubutuku ya Yesu?
- Erode songaka bo kusala inki?

C. Songa inki me salama na théâtre:

Mwana mosi sala bonso Erode, ndambu bana bonso banganga-Nzambi ya songaka Mesia ta butuka wapi, ndambu bonso bantú ya Este. Bo yonso sala théâtre kusonga inki me salama na kitini yai.

D. Yimba ti kina kusonga inki me salama:

Erode waka makasi na nsangu ya Yesu

Ntotila ya mpa me butuka
Ye yina ta lunga ve.

Yandi bingaka bantú ya Este
Ya zabaka ndinga ya Nzambi
Bo songaka yandi wapi Mesia ta butuka
Na bwala ya Betelemi.

Yandi bingaka bantu ya Este
Ye yandi kusaka bo.
Bo songaka yandi ntangu ya bo
Me mona mbwetete.

Yandi tubaka bonso yandi
Zolaka samba Yesu mpi.
Kansi yandi sosaka
Kaka kufwa yandi.

3. Bantu ya mayele monaka Yesu.

A. Tanga: Matayo 2:9-11

9 *Ntangu bo waka mambu yina ya ntotila tubaka, bo simbaka nzila bo kwenda ka bo. Na nzila bo monaka mbwetete yina ya bo monaka ntete na ndambu ya Este. Yo vandaka kwenda na ntwala na bo tii kuna yo kwisaka kutelama na zulu ya kisika yina vandaka mwana.*

10 *Ntangu bo monaka mbwetete yina, bo monaka kiese mingi mpenza.*

11 *Bo kotaka na nzo, bo monaka mbwetete yina, ti mama na yandi, Maria. Ntangu yai, bo fukama, bo samba yandi, bo kangula bamwa-sanduka na bo, bo pesa yandi makabu yai: wolo ti bima ya mananasi ti mire.*

B. Yula bana:

- Inki twadisaka bo?
- Bo kumaka tii na wapi?
- Bo waka inki mutindu na ntima?
- Bo monaka banani?
- Bo sambaka nani?
- Nani lenda tuba Matayo 2:11b?
- Inki mutindu bo zitisaka mwana Yesu?

E. Songa inki me salama na théâtre:

Bana sala théâtre ke songa bantú ya Este ke landa mbwetete, ke samba mwana Yesu ti ke pesa Yandi bamakabu.

F. Yimba ti kina kusonga inki me salama:

Bantu ya Este ya mayele
Landaka mbwetete
Bo monaka Yesu ye
Bo sambaka Yandi.

Bo pesaka Yesu
bamakabu na bo.
Bo kumisaka Yesu
Bo kumisaka Yandi ngolo.

4. Bantu ya mayele ke pesaka luzitu na Yesu tii bubu.

Solula: Inki mutindu beto lenda zitisa Yesu?
Inki bantu ke salaka ya ke zitisaka yandi ve?

MALONGI YA BAKRISTO: Pesa bana mbandu ya lombilu ya kele kaka kumisa Yesu, ke lomba ata kima ve. Bana tatu lenda kumisa Yesu sambu na mambote na yandi. Solula inki bo lenda pesa bonso makabu na Yesu. Mbandu: Bintuntu sambu na nzo-Nzambi, nkuni to masa sambu na pasteur.

KUSALA KANA NTANGU KULUNGA: Bana sala théâtre na tour. Sala yo mbala tatu ou iya sambu bana mingi lenda sala. Tuba verse mbala zole diaka.

KUBINGA NA YESU: Bambukisa bana nde nge ta zola mingi kusolula ti konso muntu ya me yamba Yesu ntete ve na ntima, ya ke zola yamba Yandi bubu. Kana bana kwisa, twadisa bo kutula ntima na Yesu.

====

NSUKA YA LESO 2

====

Leso 3--FAMI YA YESU TINAKA, NA NIMA BO VUTUKA DIAKA

BAVERSE YA LESO: *Matayo 2:12-23*

KIKUMA YA LESO: Kana beto ke tula ntima na Nzambi, mpi kana beto ke lemvuka na Yandi, Yandi ke tula bawanzio na lweka yonso na beto sambu na kutanina beto na banzila na beto yonso. Yo yina, beto tula ntima na Nzambi na ntangu ya kingonsa.

VERSE YA KULONGUKA: *Bankunga 91:11*

Nzambi ta songa bawanzio na yandi na kutanina nge na banzila na nge yonso.

Verse Sambu na Bana ya Fioti: "Bawanzio...(ta) kutanina nge"

KUYANTIKA LESO: Inki mambu ya kingonsa bantu ke mona na luzingu na bo? (Bana vutula bamvutu.) Inki mambu ya kingonsa kwisaka na Yosefi, Maria ti mwana Yesu? Ee, Mfumu Erode vandaka na kimpala sambu na Yesu. Yandi vandaka na ntima mosi ya mbi. Yandi zolaka kufwa Yesu.

MAMBU YA NENE YA LESO YAI:

I. Mfumu Erode vandaka na mabanza ya kufwa Mwana Yesu.

A. Tanga: *Matayo 2:12-13.*

12 Nzambi zabisaka bo na ndosi nde : "Beno vutuka na Erode ve." Yo yina, bo vutukaka na nsi na bo na nzila ya nkaka.

13 Ntangu bantú yina katukaka na ndambu ya Este me kwenda imene, wanzio mosi ya Mfumu Nzambi kwisaka kumonika na Yozefi na ndosi nde : "Telama, baka mwana ti mama na yandi, beno tina na nsi ya Ezipite, ebuna beno vanda kuna tii kuna ya mono ta tubila nge na kukatuka. Sambu Erode ta sosa mwana sambu na kufwa yandi."

B. Yula bana:

- Inki yandi songaka bantu ya mayele?
- Keti yandi songaka bo mambu ya kieleka?
- Yandi sosaka kusala inki? Sambu na inki?
- Keti nge ta vanda na boma kana muntu zola kufwa nge?

C. Songa inki me salama na théâtre:

Ndambu ya bana sala théâtre ke songa mpila Nzambi tubaka na bantú ya Este na ndosi ti mpila bo vutukaka na nsi na bo na nzila ya nkaka.

D. Yimba ti kina kusonga inki me salama:

Nzambi songaka bantú ya Este nde:
Erode ta sosa mwana
Beno vutuka na nsi na beno
Na nzila ya nkaka.

2. Bawanzio ya Nzambi songaka Yosefi na ndosi inki kingonsa kuvandaka.

A. Tanga: Matayo 2:13
(Tala diaka verse yai na zulu na 1 A.)

B. Yula bana:

- Bawanzio konso ntangu kele kutanina bantu ya Nzambi na banzila na bo ikwa?
- Nani lenda tuba Bankunga 91:11?
- Nani lenda tendula yo?
- Inki mutindu yai ke sadisaka bakristo na luzingu na bo?
- Wanzio songaka yandi inki nsangu ya kingonsa?
- Wanzio songaka yandi kusala inki sambu bo kuvanda mbote?

C. Songa inki me salama na théâtre:

Ndambu bana sala bonso bo ke kutanina mwana Yesu. Ndambu ya nkaka sala bonso bo ke kutanina bantú ya Este ya kwisaka kutala Yandi.

D. Yimba ti kina kusonga inki me salama:

Mwana ya Nzambi, kuwa boma ve!
Bawanzio ke kutanina nge
Na banzila ya nge yonso.

Bo vandaka kutanina Yesu mwana,
Bo vandaka kutanina bantú ya Este.
Bo kele kutanina nge.

3. Yosefi ti fami na yandi tinaka na Ezipte.

A. Tanga : Matayo 2:14-15

14 Yozefi telamaka, yandi bakaka mwana ti mama na yandi, ebuna na mpimpa bo kwendaka

na Ezipte.

15 Yandi vandaka kuna tii kuna ya Erode fwaka. Mambu yina bwaka mpamba ve, sambu mambu yina ya Mfumu Nzambi songaka profete na kutuba, yo kwisa kulunga : “Mono bingaka Mwana na mono na kukatuka na Ezipte.”

B. Yula bana:

- Yosefi lemfukaka na ndinga ya nani?
- Bo kwendaka wapi? (bambukisa bana nde Ezipte kele na Afrika.)
- Bo vandaka mbote, sambu na inki?

C. Songa inki me salama na théâtre:

Bana sala bonso bo kele Yozefi ke twadisa fami na yandi na Ezipte, ke zinga kuna tii ntangu Nzambi songaka yandi kuvutuka na Israele.

D. Yimba ti kina kusonga inki me salama:

Yozefi lemfukaka
Yandi twadisaka fami
Kukwenda na kuzinga fioti
Na nsi ya Ezipte.

4. Mfumu Erode monisaka makasi na yandi.

A. Tanga: *Matayo 2:16-18*

16 Ntangu Erode bakisaka nde bantú yina katukaka na ndambu ya Este kusaka yandi, yandi vandaka na makasi mingi mpenza. Yandi tindaka bantú na yandi na kwenda na bwala Betelemi ti na babwala yina kele penepene na yo sambu na kufwa bana yonso ya babakala, bayina ke na bamvula zole, ti bayina me lungisa ntete bamvula zole ve.

17 Mpina, mambu yina ya profete Yeremia tubaka, yo kwisaka kulunga :

18 “Na bwala Rama bo ke wa Ndinga ya nkento mosi de dila, ke tula milolo mingi. Rashele ke dila bana na yandi ; Yandi ke zola ve nde bantú kwisa kukatula yandi na mawa Sambu bana na yandi yonso me fwaka.

B. Yula bana:

- Yandi fwaka bana yonso ya inki age?
- Kana fami ya Yosefi lemfukaka ve na wanzio, inki zolaka kusalama na bo?
- Sambu na inki babwala yonso vandaka kudila ngolo?

C. Songa inki me salama na théâtre:

Bana kusonga luse ya makasi kusonga ntima ya Erode ntangu yandi monaka nde bantú ya Este vutukaka ve na yandi.

D. Yimba ti kina kusonga inki me salama:

O mawa! Erode me fwaka
Bana miiiiingi
Kansi Nzambi me taninaka
Mwana na Yandi.

5. Nzambi lundaka Yosefi ti fami na yandi na nzila ya kuvutuka.

A. Tanga: Matayo 2:19-23

19 Ntangu Erode me fwa, na nima, wanzio mosi ya Mfumu Nzambi kwisaka kumonika na Yozefi na ndosi na nsi ya Ezipite.

20 nde : “Telama, baka mwana ti mama na yandi, ebuna beno vutuka na nsi ya Israele, sambu bayina zolaka kufwa mwana, bo me fwaka.”

21 Ntangu yai, Yozefi kutelama, yandi baka mwana ti mama na yandi, bo kwisa kuvutuka na nsi ya Israele.

22 Kansi ntangu Yozefi waka nde Arkelausi me baka kisika ya tata na yandi Erode sambu na kuyala na Yudea, yandi waka boma na kwenda kuvanda kuna. Nzambi kwisaka kuzabisa yandi diaka na ndosi mutindu yandi fweti sala ; yo yina, yandi kwendaka na ntoto ya Galilea,

23 ebuna yandi vandaka kuzinga na bwala mosi, zina na yo Nazareti. Yandi salaka mambu yina sambu na kulungisa mambu yina ya baprofete tubaka, nde : “Bo ta bingaka yandi Muntu ya Nazareti.”

B. Yula bana:

- Inki ntangu vandaka mbote ya bo lenda vutuka?
- Inki mutindu bo zabaka nde ntangu me lunga?
- Inki mutindu bo lemfukaka na ndinga ya Nzambi songaka bo na munoko ya wanzio?

C. Songa inki me salama na théâtre:

Mwana mosi sala bonso wanzio ya songa Yozefi kuvutuka ti fami. Ndambu bana vanda bantu ke tuba nde mwana ya mfumu Erode me baka sika na yandi. Yozefi kuwa kutuba na bo, yandi kuwa boma. Ebuna wanzio kwisa na yandi mbala ya zole kutuba nde mbote yandi kwenda kuzinga na Nazareti, bwala ya Galilea.

D. Yimba ti kina kusonga inki me salama:

Wanzio ya Nzambi twadisaka
Yozefi, Maria ye Yesu
Bo kwisaka kuzinga na
Bwala Nazareti.

MALONGI YA BAKRISTO: Inki beno lenda sala kana kingonsa ikele? (Solula bamvutu ya bana pesaka na luyantiku ya leso.) Bo lenda lomba. Bo lenda tula ntima na Nzambi. Bo lenda buya kubokuta to kuvanda na boma. Bo lenda kumisa Nzambi sambu yandi ke lundaka bo.

KUBINGA NA YESU: Yula bana kana bo zaba mbote nde bo kele bakristo. Muntu kele mukristo kana yandi me yamba Yesu na ntima na yandi. Kana mwana ke zaba mambu yina ve, yandi lenda kwisa solula na nima ya ecodim.

====

NSUKA YA BELESO YONSO 3

====

NB: Atasio, longi!

Ntangu yai, nge me manisa kusadila baleso yai. Baleso ya mpa ke kinga nge na Centre des Materiels, sika nge me defa baleso yai. Mabundu ya nkaka mpi ke kinga kudefa baleso yai sambu bo mona mpila kulonga bana na bo. Ntangu yai, vutula materiels yonso na sachet ti vutula yonso na Centre des Materiels ya MCE. Merci mingi sambu na collaboration ya nge !